

JAWI, JAKIM teruskan misi bantu mangsa banjir di Pahang



Putrajaya: Jabatan Agama Islam Wilayah Persekutuan (JAWI) bersama Jabatan Kemajuan Islam Malaysia (JAKIM) meneruskan Misi Bantuan Kemanusiaan bagi membantu mangsa banjir di Pahang.

Misi bantuan itu turut mendapat kerjasama Masjid Wilayah Persekutuan, Masjid Abu Ubaidah Al-Jarra, Taman Sri Rampai, Setapak serta pasukan sukarelawan RINTIS (Rescue In Team Insan Sejahtera) 3.0, JAWI Food Bank dan beberapa badan kerajaan (NGO) lain.

Misi penghantaran sumbangan itu membabitkan konvoi 12 buah kendaraan dengan penyertaan seramai 24 orang sukarelawan.

Majlis pelepasan program itu disempurnakan Menteri di Jabatan Perdana Menteri (Hal Ehwal Agama) Datuk Dr Zulkifli Mohamad Al-Bakri di Masjid Wilayah Persekutuan hari ini.

Menurut kenyataan media dikeluarkan Jabatan Perdana Menteri (Hal Ehwal Agama) misi bantuan itu membawa bantuan makanan keperluan asas seperti beras, tepung, gula, dan minyak masak.

Katanya, bantuan itu juga membabitkan keperluan harian seperti tilam, bantal dan sejadah bernilai RM78,000 untuk diaghikhan kepada mangsa banjir.

"Konvoi pasukan sukarelawan itu dijangka membuat serahan sumbangan di Pusat Kawalan Operasi Bencana (PKOB) Temerloh Pahang yang akan disampaikan Pengerusi Jawatankuasa Hal Ehwal Agama Islam dan Pendidikan Pahang Datuk Seri Syed Ibrahim Syed Ahmad.

"Bantuan kemanusiaan ini adalah siri keempat dilaksanakan JAWI bersama pihak masjid di Wilayah Persekutuan dan rakan strategik selepas misi sama dilaksanakan di Pahang dan Kelantan pada minggu lalu melalui sumbangan barang keperluan asas dan harian bernilai RM275,000," katanya.

Artikel ini disiarkan pada : Sabtu, 23 January 2021 @ 1:56 PM